

tre galie, sier Valerio Marcello, sier Batista Polani, di Candia, e Jacomo di Barbis, da Liesna, qualli sono stà contenti di rimanir. Biasmano esso zeneral non li socori; hanno remandà via le galie, vene col provedador Pixani, per non haver da darli da viver, *maxime* aqua; sollicitano la nostra armada si mostri, et voriano mai quelle X galie nostre non fosseno venute de li, perchè il partir ha fato mal cuor a quelli di Modon:

Fo leto una letèra scrive Hironimo Dacha a suo fradello Nicolò, è qui orator, data a Modon, a di X. Come la terra è im periculo; turchi combate con freze, e in la terra è mal governo *etc.* Voria venisse a tuor la sua roba.

237 * *Da la Vajussa, di sier Domenego Dolfim, capetanio dil colfo, di 29 luio.* Come zonse li a quella bocha, e trovò 4 galie grosse, zoè sier Marco Tiepolo, sier Daniel Pasqualigo, sier Andrea Marzello e sier Sabastian Contarini; et tre sotil, quella di Cherso, di Sibirico e di Zara; l'altra di Traù è andata a Corfù, e la nave di Pexari; et trovò questi haver fato ben di butar saxi a la bocha, qual im più luogi è pie' tre e mezo di aqua; ma da poi che turchi tretto bombarde, nostri 0 sequiteno; et ha in ditta fumara esser galie X grosse, 16 sotil, 7 fuste in hordine per ussir; lui vederà di far il tutto non eschano. *Item*, poi vene la galia tragurina, stata a Corfù, con letere di 26, dil provedador, qual vol che esso capetanio mandì più numero di galie el puol al vice zeneral, et intese la morte dil zeneral, e come la nostra armada andava versso Modom, *unde* manda do galie grosse, Tiepola e Pasqualiga, e do sotil, zaratina e Chersso; resta li con do grosse et tre sotil, con la soa e la nave Pesara.

Et leto ditte letere, tutti di colegio rimaseno molto mal contenti, dubitando di Modom, e dannando il zeneral morto.

Di Cremona, di proveditori. Manda una letera abuta dal conte Guido di Gonzaga, li scrive a Mantoa esser stà il ducha di Ferrara, per acordarlo con il re di Franza, e far non sia con Maximiam, dicendoli: Tu è in mezo di la Signoria e dil *roy*; se non ti acordi, sei spazato. E il marchexe à dito, è contento, con questo esso ducha li sia segurtà. Et mandano missier Zuam Valla, con missier Jacomo d'Adria, *iterum* in Franza. *Item*, è tornà uno fiol di Antimacho, secretario mazor di esso marchexe, dal turco; dice il signor è molto disposto contra la Signoria, et va a Modon, e si diceva il re di Hongaria non sarà in acordo con la Signoria, il qual fiol di Chalimacho par habi studiato in Grecia.

Qui soto sarano notadi alcuni hordeni dete sier Marchiò Trivixan, capetanio zeneral di mar, ad andar contra l'armada dil turco, qualli horra si veneno.

Ordine di sier Marchiò Trivixan, capetanio zeneral di mar, dato a l'armada nostra.

Jesus Christus. In nome de l'eterno et summo nostro Signor Idio, et de la intemerata verzene et gloriosa madre Maria, et del beato evanzelista missier San Marco, defensor et protetor nostro, nel 1500, a di 18 de zugno, a Cao del Dueato,

El magnifico et clarissimo missier Marchiò Trivisano, dignissimo capetanio zeneral di mar, comanda a vuj, magnifici provedadori, capetanij, sopracomiti, patroni, et tuti i altri per suo grado, che debiati con ogni diligentia, governo et obedientia, exquir li ordeni qui soto notadi, soto pena de la indignation de la illustrissima et excellentissima ducal Signoria nostra, et a presso di perder la vita, quando per sua magnificencia serà comandado se habi a tuor impresa contra l'armada del turco, inimicha de la santa fede et de la prefata serenissima Signoria; nel qual caso tuti con le sue comitive habino ad investir animosa et gagliardamente cadaum a la posta et luogo suo, portandose viril et intrepidamente; et el primo feridor vadi ad investir, quando esso clarissimo zeneral farà alzar et callar tre volte el suo gaiardo, deputando a banda sinistra, et li altri *successive* fazino el medesimo, come qui soto serà notado. 238

El primo feridor, el magnifico missier Marco Orio, vice capetanio de le nave, con tute le quare.

El segundo feridor, el magnifico missier Jacomo Venier, capetanio di le galie grosse, con tute le galie grosse a lui deputade.

El terzo feridor, el magnifico missier Hironimo Pixani, provedador, con le galie sotil a lui deputade.

El quarto feridor, el magnifico missier Hironimo Contarini, provedador, con le galie a lui deputade.

El quinto, serà esso clarissimo zeneral, con le galie li parerà tenir a presso de si.

Et advertiscano tutti andar con l'hordine soprascritto, andar uniti quanto sia possibile, salva *tamen* la debita distanzia da un legno a l'altro, che nè intrigarse insieme, nè seguir altro inconveniente possa.

A presso nel ferir, i legni grossi investir debino li grossi, et li altri quelli de le so qualità; nè alcuno se habbi a dispensar per alcun modo da la bataglia, fino la durerà, o fino si haverà obtenuta vittoria, o